

Izjava OHR-a na konferenciji za medije međunarodnih organizacija

BiH postaje član Razvojne banke Vijeća Evrope

OHR pozdravlja činjenicu da je BiH osigurala pristupna sredstva da kao član Vijeća Evrope postane dioničar u Razvojnoj banci Vijeća (CEB). Ovo znači da će kako je i planirano, prenos odgovornosti za povratak izbjeglica biti izvršen na BH vlasti do kraja godine.

U petak Vlada Velike Britanije je potvrdila da će osigurati 40% prve rate članarine BiH u ovoj banci.

Vlada Švedske je već ranije osigurala 40% dok će BiH vlasti platiti preostalih 20%. Ovo sada znači da BiH ide korak naprijed i postaje punopravni član Razvojne banke Vijeća Evrope.

Članstvo u ovoj banci BiH vlastima omogućava pristup sredstvima koja će im omogućiti nastavak procesa povratka te postizanja održivog provođenja Aneksa VII do kraja 2006.godine, što je strategija BiH Ministarstva za ljudska prava i izbjeglice.

Ustanovljena 1956.godine, Razvojna Banka Vijeća Evrope, je jedina evropska međunarodna finansijska institucija koja ima isključivo socijalnu funkciju. Osigurava finansijske mehanizme putem kojih Vijeće Evrope provodi svoju politiku solidarnosti. Ovo je multilateralna razvojna banka sa statutarnim prioritetima kao što su pomoć izbjeglicama, migrantima, žrtvama prirodnih i ekoloških katastrofa.

Imajući u vidu da se međunarodno finansiranje smanjuje, članstvo u ovoj banci BiH nudi ogromnu pomoć u finansiranju

procesa povratka na način da se ovoj državi otvara pristup novim povoljnim zajmovima.

Krajem godine desit će se prvi veliki prenos odgovornosti na domaće vlasti tj. kada međunarodna zajednica zatvori Radnu grupu za obnovu i razvoj. Međunarodna zajednica se neće u potpunosti povući iz procesa povratka pošto će biti formirana Verifikacijska jedinica za implementaciju Aneksa 7, a OHR će nastaviti da prati povratak.

Visoki predstavnik u posjeti Tuzli i Brčkom

Visoki predstavnik, Paddy Ashdown danas je u posjeti Tuzli i Brčkom. Visoki predstavnik će se u Tuzli sastati sa predstavnicima regionalne Buldožer komisije koji će ga ukratko upoznati sa radom obavljenim na pripremanju 50 novih reformi koje će sljedeće sedmice biti predstavljene vlastima BiH, u okviru Buldožer faze II.

Visoki predstavnik će od Tuzle do Brčkog putovati vozom zajedno sa članovima Jedinice za hitne reforme u Brčkom gdje će se razgovarati o dosadašnjem napretku. Jedinice za hitne reforme sastoje se od državnih službenika imenovanih od strane njihovih odjeljenja da rade sa Buldožer komisijama i da osiguraju da se reforme iz faze II sprovode efikasno i efektno. Jedinice za hitne reforme će biti glavni partneri Buldožer komisija u organima vlasti.

Viši zamjenik visokog predstavnika, ambasador Wnendt u posjeti Banja Luci i kantonima 1 i 10

Viši zamjenik visokog predstavnika, veleposlanik Werner Wnendt posjetiće Banja Luku i kantone 1 i 10 u periodu od 5 do 7 novembra. Tom prilikom on će razgovarati o pitanjima vezanim za proces povratka sa relevantnim ministrima, te drugim bh. zvaničnicima. On će naglasiti da je na dobrom putu transfer odgovornosti procesa povratka sa međunarodne zajednice na domaće vlasti. Zakoni su izmijenjeni da bi se uspostavile nove institucije na državnom i regionalnom nivou. Više detalja

oko posjete ćete naći u obavijesti za medije koju ćemo izdati kasnije.